

欽定重修兩浙鹽法志

欽定重修兩浙鹽法志卷十六

條約二

一乾隆元年二月護理兩浙鹽政浙江布政使爲嚴飭實力稽查杜私弊以裕

國課事照得鎮海一縣所有年額引目全藉漁汛行銷凡有採捕商漁各船例照樑頭丈尺領引支鹽不許對竈私售以及重斤夾帶滋害引課至於巡鹽員役亦不得徇情疎縱講規賣放久經嚴禁在案今當春汛屆期恐有不法漁竈仍前通同作弊

合行嚴禁爲此示仰該縣官役漁竈人等知悉嗣後漁戶出洋捕魚必要按照樑頭大小領引支鹽塼明斤數赴縣挂號驗明放行不許偷越外洋買鹽夾帶致干法紀其巡鹽兵役亦必實力稽查切勿徇情賄縱倘敢仍蹈故轍一經察出定行提解究處決不寬貸

一乾隆元年四月大學士總督兼管兩浙鹽政爲嚴禁藉詞橫販以肅法紀事照得丹徒一邑爲浙鹽鎖鑰向被淮私侵越歷有案據本閣部奉

命兼視鹺務察知其弊隨經嚴檄察禁又慮該地民人受奸商擡價之累復行出示平價并責有司勿徇情面畱心查察半月一報如有奸商違犯立掣解究在案詎聞京口等處不法奸徒藉稱貧難老少串結無藉竈丁慫恿瞽廢人等以浙鹽價貴爲詞勒令店戶罷市不知私鹽價輕官鹽價重到處皆然況行鹽各有地界淮鹽之不許入浙亦猶浙鹽之不許入淮官鹽越境卽同私論律書備載矧行私乎今丹徒引地奸徒肆行不法必非一二殘廢

所爲其中明有主使梟棍往來煽惑殊難輕縱除
嚴行常鎮道查拏究處外合亟嚴禁爲此示仰該
屬居民人等知悉爾等當思四十斤以下不許禁
捕之

諭旨乃指附近場竈實在貧窮老少無可營生藉此易
米度日者而言徒以並非附竈地方並不在准其
挑賣之例爾等殘廢老少男婦本身獲罪雖不忍
卽加以

王法而罪坐家長夫男律有正條倘有違犯勢必累

及親屬且爾等原係被人煽惑本屬愚氓再不洗
心滌慮聽人指使迨至被累彼則脫然事外而爾
等親屬皆在牽連之中矣爾等務須恪守法紀安
分樂業勿受奸棍之愚勿貪意外之利勿越境以
滋事勿聚衆以犯科彼此警惕共爲

盛世之良民若執迷不悟一經根究噬臍何及地方
官弁職司守土查拏奸匪責任綦嚴如遇殘廢老
少被惑之人卽當諄切開導使之改行遷善如有
主謀奸徒查訪確實卽當協力擒拏通詳嚴究不

得稍存姑息以貽地方之害倘敢疎縱嚴叅不貸再如擺渡船戶雖係無業窮黎理當矜恤但貪得舟資擅將鹽梟渡江侵越地界法實難寬亦當凜遵告戒切勿渡私致干並處至奸商網利任意擡價地方有司務遵前檄實力查察敢有違犯通詳究處愼之愼之毋忽

一乾隆元年六月大學士總督兼管兩浙鹽政爲特嚴聞夫賄縱之禁以除載運積弊事照得石堰一場素爲私鹽充斥之區蓋緣地廣幽僻水陸四通

其出沒要隘之處惟石堰橫河二閘爲最查石堰
閘東一帶地方自鳴鶴龍頭二場與夫本場埋馬
上下兩團之私鹽皆由二閘經過梟徒夤賄閘夫
膽肆縱放販賣以致私鹽不能盡絕而閘夫人等
又復藐視場員一任嚴飭驗放竟不實力遵行殊
屬不法爲此示仰該縣官捕及閘夫人等知悉凡
有往來船隻務必報明場員查驗方始開閘放行
毋得婪賄縱放致干法紀倘敢玩違不遵定行提
解究治若該縣徇縱滋奸亦卽嚴叅不貸各宜凜

遵毋忽

一乾隆元年八月大學士總督兼管兩浙鹽政爲疏
通肩引以便民食事照得杭城地廣人稠全賴仁
和一場竈煎鹽斤給配肩販接濟民食祇以向例
該場收買帑鹽交商配掣德富二縣引目近又發
帑收買積貯鹽斤以致肩販購買維艱竈戶藉詞
昂價有累民食殊屬未便除檄飭該場員將德富
二縣引目及積貯帑鹽槩行停止統歸肩販挑賣
外查目下伏土旺起滷廣價平計算煎竈成本每

斤不過四五文肩販挑賣不過六七文自茲以往
有減無增誠恐民間未得周知竈販仍需前價合
亟出示曉諭爲此示仰仁和場居民竈販人等知
悉目下帑鹽旣已停收趁此土旺涵充各竈戶務
須上緊勤煎照本配販各肩販趁此竈鹽盈溢各
宜爭先買配公平售賣爾居民須知鹽價已減彼
此互相傳述以免貴食倘竈販抗不遵示情煎擡
價故悞民食一經訪聞定卽嚴拏重處斷不寬宥
凜之毋忽

一乾隆二年正月大學士總督兼管兩浙鹽政爲諄切曉諭以安生業事照得松屬濱海臨場十數年前食鹽甚賤嗣因私鹽充斥設立巡船巡役稽查偵緝官引疏通賣價漸貴欽惟我

皇上念切民瘼屢頒

諭旨設法平價以便民食又蒙

聖恩以行鹽資本攸關惟本輕而賣價可平奉

特旨改行票引加增鹽斤欽遵在案本閣部又恐鹽數過多將松所代銷紹台引目一萬五千道仍撥歸

台所行銷豁免松所課費并將未增斤之舊鹽許
照前價銷售課則仍舊辦理各歸口岸裁減引費
停止餘引並未絲毫有損於商在該商等理應交
相踴躍克勤生理以固世守基業乃聞爾等將應
出巡費竟不照例按時給發觀望延挨甘置引地
於不問此非有奸徒從中煽惑卽係散衆各商未
知原委合亟諄切曉諭爲此示仰松所甲散各商
知悉自今以後務宜守分急公各安生業所有應
出巡費照常給發以保引地倘或果有不便之事

不妨據實公稟以憑斟酌調劑萬勿聽信浮言違
旨病民自貽伊感凜遵毋違

一乾隆三年五月大學士總督兼管兩浙鹽政爲再
行曉諭以警愚頑以保引課事照得常昭太鎮嘉
寶上南等州縣逼近淮場濱臨海口每有奸販藉
魚鮐瓜蔬醬麪爲因插和淮私侵害引地康熙二
十四年前院李題請汛防兵捕以及收稅衙門嚴
行簽驗如有暗藏插和等弊卽行拏解按律究問
奉

旨依議勒石永遵載入縣志本閣部兼管鹽政以來屢
經諄切誠諭通飭查拏在案詎有嗜利之徒罔知
法紀借名醢切恣意營私甚有置貨航船往來如
織裝載小包假充貨物雖有緝獲率多倖漏妨礙
病課莫可枚舉在地方有司每以鄉愚無知輒行
輕縱迨至梟風肆起引壅課絀而後設法偵巡予
以嚴譴是姑息適所以養奸示恩反陷以不義殊
失化導斯民之意矣今當魚汛盛行又值民間醬
市合再通行曉諭爲此示仰蘇松二屬商民船戶

人等知悉凡爾小民或醢魚爲業或裝貨爲生守分經營本有自然之利毋行險傲倖自罹法網倘冥頑不靈復蹈前轍一經挈獲定行按律究擬斷不能爲爾等寬也凜之慎之

一乾隆三年十二月巡撫浙江兼管兩浙鹽政爲酌定賞罰規條以示勸懲事照得兩浙鹺商甲散衆多良頑不一其中額引有多寡辦課有殷最若不酌定賞罰成規無以別優劣而分勤惰今本部院以掣驗完課分爲二項每項各分等次如本名下

額引三千以上配足之外復辦有餘鹽請照過掣
者受上賞各給靴帽花紅賞酒三杯用鼓樂導出
額引二千以上配足之外辦有餘鹽者受中賞給
以靴帽花紅額引一千以上辦有餘鹽及額引僅
止數百而所辦餘鹽數倍於額者受下賞止給花
紅至於完課如首掣三千引以上不論正餘引照
至次掣前全完課費運銷者與上賞同加給獎勵
良商四字大銀牌一面二千引以上至次掣前全
完課費者與中賞同加給二號銀牌一面一千引

以上至次掣前全完課費者與下賞同加給三號銀牌一面若額止千引以內三百引以上爲數無多能於次掣前清完課費者量給花紅此外無庸獎賞乃若引不買補課不早完亦分等次示罰如消乏商人名下額引力既不能配鹽不將引目早爲交付有力商人辦銷直待掣畢查追者例應銃毀賠課近俱抵截餘照是以疲商任意藐玩今酌定不配八九百以至千引以上匿不交出者銃毀十分之一罰賠課費其九分准抵餘照不配六七

百引匿不交出者統毀十分之二罰賠課費其八
分准抵餘照不配五百以內匿不交出者統毀十
分之三罰賠課費其七分准抵餘照再掣過引鹽
按照各名下掣數不論多寡統以十分爲率如首
掣引鹽至次掣畢尚有未運一二分者寬限一月
內完課運銷如再不完分司提比未運三四分者
寬限兩月內完足如再不完該道提比若未運五
六分者寬限三月內全完如再不完詳報本都院
提比總期掣數充盈課費早足俾得年清年款免

致引壅課墮所有製備靴帽銀牌花紅等物隨時
辦給兩分司造冊報銷惟是各所情形不同而各
商引名俱非的號且有一商辦銷十數名者易滋
并數邀榮情弊除行鹽驛道將各商名下辦運各
號引名倣照錢糧歸戶實徵冊式造具歸戶的名
確冊登明住賣某縣卽日先行呈送察核每年定
於夏冬兩掣後查明應賞應罰商人的名造冊詳
請舉行慎勿以少報多以欠作完致干查究再兩
浙尚有專領帑鹽商人同屬辦課自應一視同仁

但年無定額今應作何稽核以示賞罰除行道確
議詳奪外合亟出示曉諭爲此示仰四所甲散衆
商知悉務各遵照指示規條急公買補早完課費
羣相鼓舞慎勿疲頑墮課自蹈罰規各宜凜遵毋
得輕忽

一乾隆三年十二月巡撫兼管兩浙鹽政爲特飭商
竈公平交易以免偏累事照得鹺商赴竈買鹽竈
戶煎鹽配引均屬以本謀利覓取蠅頭以辦

國課兼贍家口自應公平交易庶彼此兩不相虧乃

訪聞兩浙各商俱不親自入場惟託一二夥計及親屬家人代爲買補若輩止知圖搏主家之歡心罔恤窮竈之艱苦銀則輕平潮色錢則攪搭低小及至收鹽復暗用重秤明勒加斤甚有借此餘頭冒銷商本實則侵收入已因而竈戶攪和灰沙以抵價值煎交湊鹽以償秤頭及至捆運折耗過多抑且灰鹽艱於銷售課本難以轉輸此皆各商圖計便宜而反自悞也今本都院欽承

簡命調撫兩浙兼管鹽政惟以培商恤竈爲先務商人

竈戶同爲辦課之人並不分別歧視致有偏枯合
先示飭爲此示仰商牙竈戶秤手人等知悉嗣後
各商齊課入場買補務與竈戶照時面同定價銀
錢畫一給發不得攙搭潮銀小錢及輕短平戥收
鹽入販遵照部頒官秤公平秤收毋許私用重秤
明勒暗加至於夥計家人等輩各宜查察切勿縱
令侵冒商資剝削窮竈爾竈戶人等亦各矢天良
加工煎煮鹽須收乾色須潔白不許違禁攙和灰
漿沙土帶滷掇交有悞民食亦不許結黨團行任

意昂價有虧商本本都院諄諄告誡無非欲使爾等轉輸便易成本無虧以仰副

皇上惠恤商竈之至意倘敢玩違不遵仍踵故習一經告發訪聞定卽嚴拏重處不貸各宜凜遵毋忽

一乾隆三年十二月巡撫兼管兩浙鹽政爲嚴禁飛渡之大弊以除奸宄事照得掣驗之候鹽船雲集所下有卽欲領程開運者有卽時上棧貯厰者各聽本商之便有等奸商詭以大船貯鹽停泊水次故意俄延時日潛將船內之鹽撥入小船不納課

費不領引程私赴地頭開賣運鹽之後原船未免輕浮恐露奸跡暗挑磚石土塊壓艙上蓋數引鹽包則船仍沈重而水跡不浮旋即通梟買私補數人莫能覺更有在倉堆貯之鹽雖有經管之人奸商乘其不備潛地開倉撥船飛運抑或行賄串通移新掩舊種種弊端嘉松二所皆然而嘉秀善桐之票引爲尤甚其中嘉秀票商離所不遠隨時私運更爲便捷除現在密訪查拏外合行嚴禁爲此示仰該所官商巡役人等知悉嗣後掣過鹽船如

有卽欲開賣領有水程者方許原船存貯該所員
督令卽日開船不許停泊水次其有未領水程藉
詞延挨者卽係奸商圖舞前弊該所員立押上倉
不許存畱片引在船至於倉廩前後無分雨夜不
時加謹查察凡赴倉領鹽者務須查對程引相符
方准提撥不得偷漏片引爾各商挾本經營各宜
自顧身家毋得再蹈前轍膽肆飛渡此係蠹蝨害
課之大弊本都院除之必力一經密訪察實除將
該所員嚴叅外定提本商船戶倉夫巡役一體大

法痛處斷不寬貸各宜猛省毋致噬臍

一乾隆四年正月巡撫兼管兩浙鹽政爲嚴飭查禁
事照得仙居一邑運到商帑引鹽向例台州府掣
後雇覓簰夫載運自台至仙路經一百五十餘里
該縣過門點驗運至皤鎮又經六十餘里方能到
店賣銷今訪得有等不法簰夫在途故意逗遛延
挨沿溪偷賣慮恐交商數缺膽將蠣殼之灰攪和
鹽內冬時天凍或將溪水灌入引包及至到鎮復
又串通地棍黑夜偷售轉賣東永武縉四縣私販

在於山村越賣侵害引地種種情弊不特有虧商
本抑且關係民食此皆該縣捕兵怠巡故縱所致
除現在訪查拏究外合亟出示嚴禁爲此示仰該
屬官吏及應巡捕兵簪夫人等知悉嗣後凡遇簪
夫載運商鹽到鎮倘敢仍前在途故意延挨逗遛
偷賣商鹽及攬灰滋弊許卽查拏報究若兵捕怠
巡賄縱一經察出定卽一並究處均不姑貸凜之
毋忽

乾隆四年正月巡撫兼管兩浙鹽政爲嚴飭查禁

事照得肩販挑鹽納課領引肩挑度日稍覓蠅頭以資餬口若敢違例多斤久經立有規條不許干犯今訪得蘆瀝場額設平湖縣肩販一百二十名赴場領引在於該場江門山東等團支鹽領配經由場署秤驗每日無論輕重每擔畱鹽三五六斤方許挑往鄉鎮銷賣名爲歛出餘鹽每年計數甚多從未報出充公竟歸私橐甚至管協二員派撥家丁場役坐管若逢天雨連綿土滷少產之候假以配商季鹽上版要緊爲由措畱不發第肩販領

引一道計挑八日若一日無鹽勢必有賠課本挾以不得不從之勢每擔則出錢百文或七八十文不等餽送家丁場役以飽慾壑方許支配倘遇天晴土旺無由措畱則又藉稱飯費名色每擔勒索五六十文不等熒熒肩販何堪剝削除現在密訪查拏并較置官秤烙發外合亟嚴禁爲此示仰該場肩販場役人等知悉嗣後遵照成規秉公秤驗不得違例混鈎至於縱派家人場役藉詞勒索之處永行禁革倘敢陽奉陰違一經察出定卽官叅

役處爾肩販人等亦不得違例多斤挾帶自取咎累如敢故違不遵一並重處決不輕貸

一乾隆四年正月巡撫兼管兩浙鹽政爲飭諭場員因時比煎以恤竈苦事照得竈戶煎配引鹽先視天時晴霽再得地土旺產更須人事克勤三者俱備然後場鹽廣產掣額充盈各場員身爲竈牧查比鹽斤咸宜仰體

皇上恤竈之至意隨時寬嚴亦猶有司徵比錢糧當寓撫字於催科也今訪得管協各員不視天時之晴

雨不察地利之土溷不查人事之勤惰并不論地方之遠近一概按卯查比敲扑頻施以爲盡職殊不知竈情無從膚訴惟有賄賂攢保囑託場差鑽營倖免以致每卯使費數錢不等則是徒爲胥役作生涯究竟無裨於實政及至奸竈私煎販運則又漫無覺察有忝厥職莫此爲甚合亟示諭爲此示仰該場官攢保伍煎竈人等知悉嗣後查比煎鹽務須體察天時地利人事隨時寬嚴並用如果天晴土旺自應倍數嚴比倘遇天雨溷少亦當酌

量從寬不得概施敲扑其有路途遠離場署者不妨并卯查比至於奸竈私煎透漏尤當不時偵緝加謹堵禦以培課源不得怠玩從事爾煎竈人等咸宜仰體本都院一片婆心勤煎足配以裕掣額不得怠惰偷安通梟濟販自蹈法網以害身家其各凜遵毋得泛視

一乾隆四年二月巡撫兼管兩浙鹽政爲嚴禁梟徒扳陷無辜以安良善事照得奸徒運販私鹽律載凡有確貨卽是不必贓之多少掣獲到官杖一百

徒三年誣指平人加三等流三千里拒捕者斬是
私鹽犯案卽應得杖徒罪名

功令何等森嚴乃梟徒迷而不悟本都院屢經剴切
曉諭在案第查私鹽事發例究出產詎梟販將實
在賣鹽之人匿不供出惟將安分良民或平日挾
有微嫌或現在計圖索詐混指扳扯更有巡役兵
丁奪取零鹽并總售販一經拏獲鹽非竈產又畏
兵役而不敢供扳非擇柔懦鄉愚卽噬殷實良竈
而原獲兵役復又從中講貫不饜不休如滿其慾

則改供別陷否則一口堅供有冤莫訴而承審有司並不虛衷研鞫惟事刑訊所謂三木之下何求不得其中被誣陷害者不知凡幾或偶遇昭雪則身家已破言念及此梟販誣良加等之罪實無可道無如地方各官止圖開脫梟徒罔顧故勘人命縱梟害民莫此爲甚合亟示禁爲此示仰該屬官吏商竈軍民人等知悉嗣後挈獲私販到官務必究訊切實產竈若供吐游移卽屬誣良飛陷遵照止理現獲人鹽定律仍向梟徒是問不得混行捉

挈如初供切實及至對簿之下審屬虛誣亦卽按律加等問擬不許聽其輾轉指扳改供別陷至於實在售私濟販之人不論兵役竈丁務必直窮到底毋得藉稱誣良故意開脫致使奸徒漏網所在有司果能虛衷研訊勿事刑求則真情斷難掩飾倘敢漫不經心仍前任梟飛陷無辜擇殷詐害一經本都院提審究出實情除將梟販依律加等治罪外定將承審州縣以故勘平人嚴叅并提經捕痛處斷不姑寬凜之毋忽

一乾隆四年二月巡撫兼管兩浙鹽政爲剴切曉諭
便民遵守事照得行銷引鹽各有界限是以律載
凡將有引官鹽不於拘定行鹽地面犯界貨賣者
杖一百知而買食者杖六十其鹽入官蓋因各州
縣歲有定額考成攸關不容侵越詎今有等愚民
罔知

功令竟行越境買食在爾等無非貪圖釐毫便宜不
知一經官捕拏獲不特鹽斤入官抑且身罹法網
言念及此殊堪憫惻合行剴切曉諭爲此示仰該

屬官吏軍民人等知悉嗣後務各凜遵成法買食
本縣引鹽不得仍前貪賤越境購買致干法紀若
敢玩違不遵一經巡捕人役查拏詳報定行按律
究治斷不姑寬爾商鋪人等亦不得借官營私違
禁越賣致干察究各宜凜遵毋貽後悔

一乾隆四年三月巡撫兼管兩浙鹽政爲嚴飭曉諭
實力偵巡以收疏銷實效事照得常昭二縣地方
廣闊甲於通所全賴巡緝綦嚴私梟屏絕方克引
疏課裕是以特設內海巡船往來堵禦毋使海梟

侵越今查岸巡一十六處未免冗繁其中輕重失
宜徒糜商費自應斟酌損益方收實效如該邑之
福山鹿苑白茆徐六涇爲海船進口要隘原有巡
查簽驗之責其耿涇海洋塘高浦又與江陰接壤
石牌與崑山聯界而永壽等沙又孤懸海外地俱
新闢實爲內地藩籬巡緝稽查不容稍懈至若唐
橋陳浦西洋高浦大沙奚浦雖通海口然水港窄
淺重船難以出入均非關鍵要隘飭將唐橋等六
處早巡悉行裁汰卽以所省之費雇募勤慎水手

派入內巡各船督令實力梭織遊巡毋許仍前停泊坐守一隅至於商捐巡費原爲緝私疏引而設奚容遲緩致滋守候並有以貨抵算任意扣折以致各商不能督責巡役得以藉詞徒具虛名難收實效合亟出示曉諭爲此示仰該縣公散各商知悉嗣後給發巡費每月定以初八日務以現銀按期實給不得剋扣準折致滋守候倘敢陽奉陰違仍蹈故轍徇私悞公者該公商卽行據實指名稟報以憑差拏從重究處斷不寬恕

一乾隆五年四月巡撫兼管兩浙鹽政爲嚴禁買食私鹽以肅鹺法事照得德清一邑乃係行銷正引之區地處水鄉支港繁多梟徒運販私鹽橫行踞賣以致引壅課絀自前督院李竭力禁緝設法整頓以來發帑收鹽飭商領運減價賣銷商民兩便詎今不法之徒復萌故智雖不敢公行運賣然自十斤以至數十斤隨時包裹潛匿攜帶殊干鹺法令亟嚴禁爲此示仰官捕保甲里民人等知悉各宜安分守已買食本邑官鹽切勿貪賤越買私鹽

干犯法紀自禁之後倘有仍前越買包裹潛藏攜帶者一經拏獲到官定行按律究處決不稍爲寬宥

一乾隆六年九月總督兼管兩浙鹽政爲戒諭梟徒改業營生免罹法網事照得稂莠每害嘉禾私鹽最妨官引欲使引疏課裕端在靖販除梟本都院披閱各屬案情以私鹽具報者殆無虛日此雖場員疎縱奸竈偷漏亦由爾等貪利橫販之所致也第念挾本經營何業不可乃必欲以販私爲利藪

妨課蠹離殊不知巡鹽兵役星羅碁布梭織往來
斷不使爾等漏網挈獲到官輕則枷杖重則徒流
鹽貨照例入官資本悉歸烏有至於拒捕傷人又
應問擬斬絞是利未得而害卽隨之更有賄串兵
捕通行販賣若輩惟知索詐谿壑難填稍不遂欲
釁端立起又不得不從厚餽送究之歸已仍屬無
多一旦敗露卽身罹法網利少害大爾私販何不
思之甚也本都院念爾等原屬良民貪利犯法不
教而誅在所不忍合先期示開誠曉諭爲此示仰

按屬官弁軍民私販竈戶人等知悉嗣後爾等販私急宜洗滌肺腸痛改前非另圖別業仍不失爲盛世良民此番告誡之後倘仍怙惡不悛興販如故則冥頑不靈化導無益一經獲報本都院惟有執法除奸從重治罪斷不曲爲姑息以長梟風爾等固乏身家豈無性命切勿以身試法噬臍莫及至於所在應巡官弁尤須嚴督兵役在於水陸要隘晝夜巡查凡有船裝陸運大夥小販私鹽俱必人鹽並獲毋許疎縱敢有通梟賄放以及誣良訛詐

擾害閭閻情事該管官立即嚴拏詳報以憑大法懲處慎毋瞻徇容隱並干叅處各宜凜遵

一乾隆七年三月巡撫兼管兩浙鹽政爲嚴禁冒捏遺失鹽引以杜重照滋弊事照得部頒引目攸關行鹽辦課原爲區別真偽杜絕營私自應慎重收藏不容遺失至查票引一項乃係商人轉給肩販赴竈支鹽挑賣行銷每一肩販給引一道部限八日挑銷期滿交商彙解此定例也今本部院下車以來披閱失引案情非藉云火患卽詭稱水失或

云人亾物故或言途次遺忘種種飾詞不一而足
其中固或有此等情事而冒捏遺失希圖弊混者
亦復不少此雖商販作奸亦由該管官不留心覺
察所致合亟出示嚴禁爲此示仰各屬商販人等
知悉嗣後領運銷賣引目務於運銷限滿之日遵
例卽行收繳解道聽候彙解大部察銷切勿藉詞
捏報致滋私弊敢有故違不遵希圖藏匿重照影
射一經察出定卽嚴拏商販究治失察之該管官
照例叅處斷不輕宥

一乾隆八年九月巡撫兼管兩浙鹽政爲請嚴越買以免商累事據浙江鹽驛道詳稱查得靖江一邑奉

旨行銷浙鹽官收崇鹽運靖由官秤驗然後商領配引貯厥驗籌給販定價售賣杜私便民在商人鹽必由官秤驗給領配引已無借官行私之處照依定價憑驗官籌給販亦無敢增添毫末之弊祇緣鄰境就近民人或在靖江向販買食語言服色相同在販焉能人人察其來歷然小民貪賤之情亦不

能必其盡無若不請定嚴禁越買之條而徒事關提則輾轉扳累無窮相應詳請通飭屬縣照例私鹽止理現獲治以違禁越買之條不得一任指扳輾轉提質致滋擾累仍請飭行江陰縣多設兵役在於沿江處所週行密布實力巡緝則越買之弊不禁而自絕矣等情到本部院據此除移咨江南督撫部院飭禁外合亟出示曉諭爲此示仰該縣官捕商販軍民人等知悉嗣後除買食場私及越境侵販者仍嚴查提究外如係買自靖邑照例止

理現獲治以違禁越買之條毋得任其指扳輾轉
提質致滋擾累仍嚴飭應巡捕兵在於境內晝夜
往來巡查毋得怠巡縱漏倘敢故違捏飾混供者
一經察出除拏兵捕究處外定將該縣指叅斷不
寬貸

一乾隆九年五月巡撫兼管兩浙鹽政爲嚴飭查禁
事照得海寧至省一帶河道爲商鹽輓運及重載
往來要道全藉閘壩蓄積水勢深通運行無阻近
緣有等地棍奸民每遇捆運之時糾合漁戶壩夫

暗行挖洞將水放流下河每至乾涸希圖雇船駁
運乘機勒索重費習爲錮弊今時值商鹽捆運之
候更兼民間種植田禾灌溉之時查有海邑之王
家板閘地方水缺尚未修整難以延緩有悞商民
運載合行嚴禁爲此示仰該地居民漁戶壩夫及
總保人等知悉卽將王家板閘坍卸水缺卽行堵
塞修築堅固其餘一帶壩堰務著地保晝夜防護
如有滲漏之處卽行修築完固務使河水深通重
載過行倘有前項不法棍徒希圖勒價駁載偷挖

聞壩漏洩河水者卽行嚴拏交縣詳究如地保徇縱有悞鹽艘重運定行一并拏究斷不寬貸

一乾隆九年七月巡撫兼管兩浙鹽政爲嚴禁肩販違例挑銷杜弊源以疏額引事照得仁錢二縣地當省會戶口紛繁商賈雲集所需食鹽倍於他郡是以設立票引給販定期挑銷接濟民食以疏額引而肩販挑鹽行走及餘杭隔界入場支鹽與賣完繳引俱有定制難容違玩今當醬市甚殷正民戶需鹽之候誠恐不法肩販故違成制私走別路

影射重照以及梟徒假冒貧難挈妻帶子并老販
恃有官籌多斤轉擔等弊有礙引課合行出示曉
諭爲此示仰仁錢二縣肩販及巡鹽員役人等知
悉嗣後凡有肩販務遵成例領引一道每日支鹽
一擔每擔止許百斤照限挑賣八日繳舊換新毋
許影射重照其入場支鹽照例於卯辰二時由清
望二門進出不許違例私走別門希圖轉擔重挑
影射滋弊至於老販每日赴場支鹽必須照依木
籌定數倘有年貌籌摺不符多斤轉擔以及冒稱

貧難老小婦女攜筐籃挈使害引地卽行嚴拏其餘杭肩販入場買鹽亦須遵照時限由清望二門行走挑鹽回縣仍出武林門由餘杭塘歸縣挑賣不許私走東新關畱下等處地方如敢故違卽行拏究斷不輕恕

一乾隆九年九月巡撫兼管兩浙鹽政爲特飭查禁清弊源以衛商課事照得商人挾本行鹽上輪國課下濟民食顆粒無容竊賣而船戶受雇裝載理宜小心輓運潔已無私以盡典守之責乃有不法

船戶凡杭紹二所商鹽雇船裝載運往徽屬各縣
住賣者竟敢沿途偷換食物零星售賣今更訪得
船戶之最不肖者莫如涇邑撐駕梭船之人自嚴
至徽水淺灘高船身宜小撐駛伶便方于客貨無
礙惟有此等船戶不善撐駕又將梭船放寬貪圖
多載往往上灘致令船壞失水凡百貨物一遭滲
漏大虧商本卽今各商所雇梭船戶俱係涇邑民
人是引鹽裝運在船罔顧商本輒敢恣意偷挖舟
至涇邑勾連奸猾土棍搬運頓積轉爲興販甚至

竊運歸家復令子姪提筐挈籃擺賣街市藉稱饑民橫行無忌而無知各鋪亦有以貨換易致清邑引地被其侵害官鹽難銷而應巡兵捕概置不問殊堪痛恨若不嚴行查禁不特有害商資抑且大爲礙害合亟曉禁爲此示仰該屬軍民兵捕船戶人等知悉嗣後凡裝載貨物務須小心撐駕毋致疎虞有損商貲其輓運引鹽尤宜謹慎毋許違禁偷取顆粒倘敢仍前勾連土棍頓積興販及無知店鋪換易私鹽并竊運歸家提擺街市藉名橫賣

者立行查拏詳究應巡官弁嚴督捕役汛兵在於沿河各處晝夜巡緝務使經過鹽船毋許粒鹽上岸實力禁緝以遏梟風如敢怠巡庇縱或經訪聞或被告發定行官叅役處斷不寬貸

一乾隆十三年七月巡撫兼管兩浙鹽政爲嚴禁兵捕賄縱之弊以靖引地以肅

功令事照得私梟運販無非步擔船裝經由往來處所俱經設有塘汛遊巡兵目在廳縣又有應巡捕役若平日果能加意偵巡稽查嚴密梟徒何從託

足浙省幅員廣闊或濱臨江河港汊紛歧奸徒偷漏出沒無定或地處偏僻廣漠叢山結隊聯羣肆行潑販或逼近場竈勾串煎丁朝偷暮運恣意營私更有肩販之重照影射越境侵擾奸民之刮土成窳積滯私煎種種弊端難以枚舉至江省行銷引地如常昭太鎮嘉寶上等州縣俱係濱海之區對峙淮崇梟徒每多潛蹤口岸在於崇岱等處裝載私鹽希圖越販如華奉婁金崑新青南等縣俱係逼近場竈毘連湖泖梟徒串通奸竈營私舞弊

不一而足然在汛防弁兵應巡捕役莫不深悉其蹤跡熟知其遁藪若文武員弁果能實心督緝梟徒何難盡除乃今各營將弁印巡各官以緝私爲末務並不實力偵巡一任兵捕骫法作奸受賄包庇以致梟徒肆橫侵擾引地甚至案未審結仍然復販毫無忌憚大千

功令除現在密訪查拏外合行出示曉禁爲此示仰闔屬文武員弁兵捕人等知悉嗣後務須凜遵法紀嚴督應巡兵捕在於水陸要隘私鹽出沒處所

周流巡緝加緊堵禦毋論大夥小販及窩國奸梟
務必人鹽並獲該地方官執法審究倘敢仍前怠
玩賄庇縱漏別經發覺審明私鹽由何處塘汛地
方經過者除提兵捕到轅大法究處外定將該管
文武員弁以縱私失察一並嚴叅各宜凜遵毋違
一乾隆十三年十二月巡撫兼管兩浙鹽政爲曉諭
事照得海鹽縣屬之黃灣西路兩場沙地於題復
竈丁課地案內仍循一丁到海之說按丈徵課不
計頃畝是以課少地多茲據原竈潘朗山等呈請

情願一體報陞按畝認課由司道查明具詳前來
本都院念該處沙地雖已起徵而未經開墾成熟
者尚多尚無漏課情弊准仍給各該場竈照舊認
墾管業將復課案內地畝查照課額扣除截清現
在畝數造冊核題并將緣由奏明荷蒙

俞允欽遵在案合行出示曉諭爲此示仰該竈戶人等
知悉爾等各宜感戴

皇恩勤力墾治按畝報課按年起徵不得仍前稍有隱
漏致干察出嚴究再此項地畝與天漲沙塗准民

竈並墾者不同如有胥役棍徒妄生覬覦希圖侵佔許該竈戶具稟該地方官查究爾等亦不得藉端滋事干咎

一乾隆十七年八月巡撫兼管兩浙鹽政爲嚴禁奸商夾帶之錮弊以肅鹺法事照得商人買配引鹽自應遵照鹺規捆運赴掣若夾帶營私必干

功令今查得鄞奉二縣住賣引鹽一月之中定以三十六九日期由府就近親臨掣驗或該府遇地方公務殷繁每每轉委在城佐雜等官代掣以致該商

等毫無畏忌是以運掣之時每有不肖奸商勾通船戶預備夾艙夾底等船或鋪散鹽艙底面蓋引鹽混行過掣或藏小包夾帶種種積弊皆緣轉委之官並不嚴加稽察一味庇縱滋奸不特營私漏課更且做壞鹺法除現在嚴飭查究外合亟出示嚴禁爲此示仰鄞奉二縣住商船戶及掣驗應巡官役人等知悉嗣後各商赴掣引鹽務須恪守鹺規捆運到所聽候秉公掣驗該委員亦應先將赴掣引鹽按查明白然後驗放所在應巡官弁協同

差承務必實力巡查倘有不肖奸商仍前勾串船戶夾帶滋弊立即嚴拏交縣究報船鹽封貯毋得徇情庇縱亦不得滋生事端如敢故違一經本部院察出定卽官叅役處均不姑寬

一乾隆十九年四月巡撫兼管兩浙鹽政爲特檄嚴行查禁靖販源以保引課事照得平湖縣所屬之乍浦鎮逼近海蘆二場爲私鹽出沒之藪今訪有海沙場三九兩團竈戶每多充當衙役暗令子弟持負籃鹽二三十斤不等絡繹成羣充塞城市又

有地棍冒名兵卒凡有海運帑鹽過塘之處勾連船戶腳夫乘機偷挖公然售私若遇查拏藉稱食鹽逞刁抗拒該地民人利賤食私見有拏獲羣相衛護惡習成風肆無忌憚遂致該地肩販官鹽艱於銷賣所在文武亦不設法查禁以致伊等滋弊叢奸害鹺悞課殊屬不法除現在嚴飭查究外合行出示曉禁爲此示仰該縣竈販兵役及地方人等知悉嗣後各宜凜遵法紀倘敢仍前怙惡不悛藉名緝私及地棍勾串偷挖帑鹽公然運賣者所

在應巡兵役立即嚴拏解縣按擬究詳倘兵役賄縱滋奸一經本部院察出定行提轅一並盡法究處均不姑貸

一乾隆二十年九月巡撫兼管兩浙鹽政爲特飭諭積梟痛改惡習以保身命事照得鹽法首嚴私販一經有犯法在必懲查松所引地非濱臨海隅卽界連場竈更兼對峙淮崇梟徒興販最爲便捷屢經嚴飭所在文武員弁實力偵巡以冀官疏私靖并經前各院訪確大梟姓名諄諄誠諭開誠曉

禁並嚴飭所在地方官交明總保管束并押令朔
望赴縣點卯過堂不時稽察取具自新遵依及保
甲鄰右不敢縱販切結存案近訪得犯案發驛鹽
徒悉皆赦回故土尤當感戴

皇恩痛改前非別圖良業無如若輩不思悛改以爲販
私利重故智復萌紛紛再犯甚至煽惑鄉愚誘其
犯法此皆由所在印官並不將前院立法稽查梟
徒緣由實力遵奉辦理一任不肖書役受賄寢擱
以致各梟仍敢販私恣意侵擾壅引悞課官商受

害殊堪髮指所有積惡巨梟姓名本部院現在訪
確何難按名立挈到轅悉置嚴刑第不教而誅情
有不忍姑暫從寬典飭取甘結予以自新合再頒
示曉諭爲此示仰該屬官弁兵民捕役及梟販人
等知悉爾等積梟速宜洗滌肺腸別圖生計仍不
失爲

盛世良民倘此番誠諭之後怙惡不悛膽敢仍前興
販煽誘愚民擾害引地一經挈獲定行先提到轅
盡法重處保結鄰右一并治罪斷不姑寬至所在

巡印官弁務須嚴督兵役實心偵緝遇有後開積
梟仍行潑販立即協拏人鹽交明有司從重究擬
倘敢通梟賄放以及不肖書役寢擱不行一經察
出官則嚴叅役則杖斃各宜凜遵毋致噬臍

一乾隆二十三年十一月巡撫兼管兩浙鹽政爲示
禁竈戶私耕漏糧之積弊以重

國帑事照得竈地一項攸關

國課私墾漏糧定例森嚴一經干犯法難寬貸今查
大嵩場竈戶住居邊海樵薪山川罔知禁令每多

竈地私墾佈種禾苗雜糧等項其中稍有畏法之
戶赴場具投一呈終年並不陞科至頑梗之輩竟
行私種私墾有害課餉除現在嚴飭查究外合行
出示曉禁爲此示仰該場竈戶及應巡保戶場役
人等知悉嗣後該墾戶務須凜遵法紀如已墾各
地統限一月內據實具報若逾限欺隱一經查出
照欺隱田糧例計畝科罪追田入官斷不姑貸所
有應巡保伍場役必須時加巡查遇有奸竈私墾
隱匿立即稟場嚴拏詳究該役等倘敢扶同徇縱

以及滋事該場員亦卽嚴拏究革具報均毋違忽
一乾隆三十二年正月巡撫兼管兩浙鹽政爲再行
曉禁以濟運掣事照得杭所商鹽運掣例由艮山
門外河道運赴杭所前掣驗緣艮山門外覓渡施
家橋等處向有佃戶築籬蓄魚鹽艘過籬易於滲
漏據杭商汪肇豐等具呈以該佃戶蓄魚多有暗
椿硬籬阻截水道願請認完佃課拔籬起椿等情
本部院軫念商民係屬一體若將椿籬盡行起拔
固利於鹽艘通行但於民間蓄魚生計恐有妨礙

之處當經批飭該鹽道會同布政司妥議詳覆去
後嗣據該司道勘詳覓渡橋并濫口港二處中畱
行船河道二丈九尺施家橋四丈四尺大船三隻
可行并飭該漁戶不得再有多佔復經批令出示
嚴禁各佃所該簾簍務遵定址在於兩旁簽簍毋
得暗插中流致礙運艘在案茲當驗掣之期誠恐
各佃戶人等復有多佔致害運艘合再通行曉禁
爲此示仰各佃及運商船戶人等知悉務各遵照
前勘定址丈尺畱出俾鹽艘通行其所設簾簍只

許在於兩旁簽斷毋得暗插中流致礙運掣倘敢
玩不凜遵定將該佃戶等重懲斷不稍貸至該運
商船戶亦不得藉端滋事並干究處

一乾隆三十五年十二月江南徽州府祁門縣爲查
訪事奉本府牌開蒙按察使司詳議查越販私鹽
必以越境爲據徽郡行銷浙鹽應行地面俱有一
定章程如已越境卽應照律問擬亦祇究本犯不
得累及商店如未越境豈容違例滋擾應請飭令
該縣在於界口勒石曉示毋得在應銷內地妄禁

妄阻藉端滋擾庶鋪販得有遵循縣役不致匿案
滋事阻誤鹽法倘地棍人等阻撓勒石卽行詳究
並取具碑摹及遵禁緣由通報查考等因奉總督
部堂批仰卽如詳飭遵又奉巡撫部院批仰卽如
詳勒石曉示毋許在應行之地妄挈滋事取具碑
摹及遵禁緣由通報又奉兩浙鹽院批仰安徽按
察司查照兩江總督部堂安徽巡撫部院批示飭
遵具報至所議引鹽在於應銷地面毋得以私鹽
妄報混挈勒石曉示以杜滋事之處如詳飭照等

因奉此查祁邑民間食鹽分銷黟邑浙引各子店赴黟邑漁亭商戶領買到祁拆賣縣屬之東關及南鄉之蘆溪到湖西鄉之高塘等處俱係應銷引鹽地面查西鄉高塘領賣之鹽必由南湖出到湖入楊村借浮河繞道而過始至高塘誠恐巡役船戶地棍無知仍前混阻滋事合并出示曉諭爲此示仰縣屬商鋪鹽捕巡役船戶人等知悉嗣後黟祁兩邑分銷拆擔及船裝領運引鹽各聽商鋪貿易巡役人等遵照憲行詳定章程或有奸販偷越

楊村之下只就本犯律擬不得波累商店如在縣屬之東關及蘆溪到湖高塘等處應銷地面毋許妄挈滋擾倘有巡役船戶地棍阻撓生事許商店指名呈稟定卽嚴挈詳究斷不寬貸合行勒石嚴禁以垂永久各宜凜遵毋違

一乾隆四十一年四月巡撫兼管兩浙鹽政爲通行曉諭事案據紹所商人許紹泰等呈稱商等紹所掣過引鹽堆存蕭山縣地方義橋新壩兩處於本月十一日至十四日夜半靈雨連綿江水過塘所

存已掣引鹽共十餘萬引盡被水浸極力搶救者
僅止二萬餘包現蒙委員查勘乃水歸下游又將
紹邑各場場竈倉鹽又遭淹浸商等困苦情形莫
此爲甚不但將來倍價難購抑且現在無鹽可配
查各店存鹽無幾補買趲運不免較常稍遲恐各
地民人不知商等趲辦緣由致生事端商等雖現
在實處計窮力竭斷不敢漠視合將現在被水趲
辦實情先行稟報叩賜給示飭知各縣曉諭民人
商等自應凜遵設法不惜成本上緊竭蹶赴場趕

買補掣配運以濟民食等情當批已掣倉鹽遭水
前據所員稟報業已行道確查實在沖沒數日照
例補掣嗣又據場員稟報知三江場鹽亦有被水
消浸之事因慮該商等買補維艱又已札道確查
如有就近別所之場鹽可以撥買者詳報以憑借
給買運爾等各商均應多備鹽本銀兩一俟查確
速行買運毋悞民食爲要仰鹽驛道仍卽速催各
商先將撈獲之鹽上緊趲運以資接濟並據該道
查有乍存帑鹽可以借撥經本部院確核飭辦並

飭該道將存場之鹽飭商速行補掣但查該商等
存壩存場各鹽既有漂沒雖督飭各商不惜重價
上緊趕買捆運以濟爾等民食但一時購補較常
不無稍稽恐有無知棍徒藉端滋擾以及各肩販
故意多買囤積均未可定除通飭各該縣查察外
合行給示曉諭爲此示仰該縣民人知悉該商等
鹽雖被水現已不拘借撥買補均飭上緊趲運以
期民食有濟斷不許其脫銷外倘有棍徒故意藉
端擾累者許該商指名赴該地方官稟明究擬詳

報毋稍容隱各宜凜遵

一乾隆四十三年八月護理兩浙鹽驛道嘉興府知府詳爲商累同情等事查杭嘉松三所商運引鹽自場運所自所運地悉藉船裝在各商課本資重惟期輓運迅速然船戶衆多良頑不一每有不肖船戶罔顧法紀或私自夾帶或沿途偷竊商本暗遭侵蝕無可隄防間有沿途發覺非奸船藉口誣扳卽胥役串囑飛噬本商無辜遭累羈畱轉運殊於掣期引課均有窒礙業經囑前道將紹所商困

情形詳報憲案凡獲有竊盜夾帶鹽船到官只就
本犯治罪倘敢供扯商人概免傳質等因飭遵在
案旋據杭所衆商稟請一例詳明飭禁等情當經
前道批飭嘉松分司查議去後今據該分司具詳
以杭所引地例係嘉所通銷飭據杭嘉二所甲商
等分別議稟查明商人挾本營生斷無沿途自偷
自鹽賤售虧本反罹法網之理又經該分司復查
鹽法志載康熙十二年鹽院憲行船戶夾帶或遇
盤驗事露罪及船戶不許累及本商并給商運賣

限帖內載明倘有不肖船戶沿途偷竊包鹽易換貨物或經捕獲許於就近衙門呈報毋許波及本商稽畱轉運等語應如商請詳明立案等情詳覆到道又據松所八地商人具稟松鹺全隸江南通臨海浦船戶偷竊尤甚每被誣扳飛噬叩請並詳飭禁前來應請俯如所議通飭各縣場所各官照志勒石永遵嗣後船戶裝載引鹽如敢偷竊夾帶一經捕獲發覺許于就近衙門呈報止就本犯審擬計斤科罪船隻照例入官變價抵償毋任胥役

作奸串累本商所有該商引鹽仍聽另雇船隻提裝開運以濟民食倘敢違例稽畱轉運並許該商上控提究如此立法森嚴船戶各知警惕庶使商業得安引課有裨理合詳明奉鹽部院王批如詳通飭勒石遵照

一乾隆五十一年七月巡撫兼管兩浙鹽政爲曉諭事照得常山引鹽分銷廣信府屬七縣向爲紹所銷鹽之要地逐年私鹽充斥官引壅滯皆緣義新兩壩逼近場竈爲私鹽出沒之區而錢邑之江干

荷葉包私鹽尤易藏帶甚有積慣梟販滿船裝載揚帆直上以致常邑引地被其侵擾官引壅銷大爲鹺政之害今據鹽道詳據紹所商人等具稟各項船隻夾帶私鹽俱由常山縣城外之三里灘起卸但近城路徑叢雜易於分散向來所設巡役無幾稽察難於周密惟常邑之焦堰地方離城四十餘里爲大小船隻赴常必由之要隘請於此處設立商捕二十四名巡船四隻商等督率各捕會同營縣兵役在於該處境內梭織遊巡晝夜偵緝凡

有上常船隻逐一稽查如遇私鹽隨時拏獲稟縣
究詳等情應如所請分別移行辦理所有商捕巡
船各費應聽該商自行捐辦毋庸動支公項免其
造報並賜檄行文武衙門一體緝巡等情除批如
詳速飭遵照外合亟出示曉諭爲此示仰商捕兵
役軍民船戶人等知悉爾等商捕兵役在於焦堰
地方務須晝夜偵緝凡有上常大小船隻無論官
民乘坐均須逐一稽查如遇私鹽卽行拏獲稟縣
究詳倘有不法船戶夾帶私鹽或藉裝差使不服

稽查亦卽指名稟究務使奸梟淨絕官引暢銷倘
敢徇縱滋事察出定干嚴究至爾船戶等亦各安
分營生毋再仍前膽玩夾帶自投法網致貽後悔
一嘉慶元年九月兩浙鹽運使司爲崇儉黜華以裕
商本事照得浙商資本微薄屢蒙

恩綸體恤本非淮南可比自宜克敦節儉充輸

國課乃向來風氣尚號淳樸近時漸尚奢華以祖父
艱辛之產業供子孫衣食之花銷蕩廢資財日甚
一日以致不數年間更形疲乏本司分巡溫處者

一載總理糧儲者三年浙商情形久經稔悉今蒙
恩擢授嵯衡專司鹽運惟以恤商爲本亦願商自恤其
家務宜斂無窮之谿壑培有限之脂膏庶幾經營
貿易資本充盈俾

國課早輸家豐人樂於各商等有厚望焉

一嘉慶二年二月兩浙鹽運使司爲飭商加價收買
場鹽以杜竈戶售私事照得各場煎丁均屬無藉
貧民惟恃煎鹽以爲餬口旣無升斗之儲更無負
販之業惟賴商人課本赴場源源接濟隨煎隨售

盡付現錢竈戶即可謀生何必冒險售私自取罪
戾更可慮者售與商人價不過數文而售與私販
增價或至十之二三竈戶等但知重利罔顧嚴刑
該各商務須通盤籌畫將收鹽場價量予加增現
錢收買俾竈戶既有贏餘又無拖欠上不畏縣場
稽查之擾下可省胥役挾索之需是雖驅之漏私
而不願矣商人雖少加成本而少賣一斤私販卽
多銷一斤官鹽貪買三之廉買五之小往大來正
在多錢善買耳各宜遵行毋違

一嘉慶二年四月兩浙鹽運使司爲嚴禁肩引侵銷以護正地事照得各地行銷肩引原爲逼近場竈起見於便民食鹽之中隱寓禁民售私之法所以最近各地行銷肩票次近各地行銷住票離場漸遠輸課漸增立法之初原爲至善乃查近年銷數其界接票引之各正地往往不能旺銷推原其故皆由肩販侵銷所致荷葉包等類此其小焉者也甚者轉擔重挑囤積船載肩販卽爲有恃之私梟而票商卽爲無形之窩戶漏私墮課職此之由爲

此仰各正地經商於票地交界處嚴行設隘晝夜
巡查毋使肩販越入其額支肩鹽各場員尤宜悉
心查察親自驗給毋許影射重挑如有以身試法
者立即嚴拏稟報以憑重究

一嘉慶四年二月署理兩浙鹽運使浙江督糧道爲
曉諭設巡事案奉巡按兩浙鹽政批前司詳孝豐
衆商具稟錢邑肩私囤積瓶窰梟販假道餘杭之
瓶橋關王嶺石門村瓜村黃湖十五梯等地請諭
該地巡商在黃湖鎮設隘稽查選販坐銷協挈錢

邑肩私復可限制餘杭衆販侵越并據餘杭巡商
程公裕稟保肩販三十二名坐銷黃湖立法稽查
選捕八名督同協緝分別飭遵試辦未幾旋有張
公位姚大鵬等阻撓滋事飭據寧分司會同錢餘
二縣提掣到案訊究杖責並聲明黃湖設隘於緝
私有益詳覆批飭發落又據商人王寧裕舒丙榮
等稟請立碑勒石批據甲商吳康成等稟覆黃湖
由錢餘侵孝出入要道設隘定販在鎮坐銷無虞
民食所請誠爲疏引杜弊起見詳請示遵等緣由

奉批仰卽諭飭該商等照案設隘稽查勒石并飭
餘邑及委員督巡如有梟販阻撓滋事卽查拏究
報一面飭巡商督同販捕實力堵緝以衛正地又
奉巡撫部院憲牌准鹽院咨開據該司具詳孝豐
商人稟請餘杭黃湖鎮設隘稽查勒石一案仰司
卽便轉飭各等因奉此除諭該巡商程公裕照案
設隘稽查督販坐銷並設捕協緝行餘杭縣及委
員督巡外合行頒示勒石永遵爲此示仰捕保人
等知悉嗣後坐銷黃湖各販務須遵照填引憑摺

挑鹽赴隘挂號蓋戳銷賣日逐賣剩餘鹽寄貯隘口次日帶銷并協商捕隨同巡商在黃湖等處堵緝遇有錢邑肩私及非商保坐銷販鹽過隘扭拏送究倘有梟販地棍阻撓滋事卽稟官嚴拏究報如該販等不憑引摺夾帶偷漏及商捕徇縱均干究革各宜凜遵

一嘉慶四年七月江南蘇州府常熟縣昭文縣爲環叩一例飭禁以裕引課事奉署理兩浙鹽運使司浙江督糧道咨開查得常昭二縣行銷松引與長

元吳三縣連界同屬蘇郡該二縣福山等處對渡
淮界與通州場竈毘連向有藉販醃臘蒸魚到地
其中貨少鹽多借名影射牙行通同窩頓恣意侵
越以致引地歷年缺銷查醃臘各貨定例每貨一
石祇准在沿途官店酌買二斤以禦潮溼不准多
帶違犯照例究治貨物入官牙行通同一并辦理
又蒸魚投行抖下餘鹽責成牙行儘數交商歸垣
每斤償價四文如竟係潔鹽灌包或外更有備帶
明係串販亦照私鹽例分別治罪又于乾隆六十

年間據常昭二縣議詳凡葡乾瓜丁醃貨進口每有夾帶請飭鹽役協同牙行逐包簽驗前司批飭遵行各在案今據松所商人吳常順等具稟前來飭據甲商稟覆前情自應俯如所請一體勒禁并由司給簿飭令按月填注稽考取具行戶依結通送備案頒示曉諭俾知遵守相應據情詳明伏候憲臺批示以便轉飭遵照另取碑摹呈送等因除報明兩江督部堂江蘇撫部院查考外等因到縣奉此合行勒石永遵爲此示仰商民行鋪牙戶客

販應巡兵捕人等知悉爾等販運醃臘蒸魚鹽貨
遵照成例每百斤祇准備買二斤以禦潮溼不許
混帶多斤如貨進口投行該牙戶協同巡役逐包
簽驗如有夾帶立即查拏解候究辦船貨入官牙
行隱混一體治罪各行抖下餘鹽務須隨時交商
入垣按斤領價不得藉護稽延希圖固積營私致
干咎戾巡役人等均各凜遵

一嘉慶四年十月巡視兩浙鹽政爲嚴切曉諭事照
得運庫錢糧按卯清完款項飭令迅速開運乘時

銷賣不致有虧成本所有聯票木戳水程引目尤應趕緊辦理不得輾轉遲延藉生弊竇兩浙商力微薄轉運維艱固宜優加體恤堅其輸將恐後之心方於庫貯有裨至聯票等項既經承辦經書各司其事亦宜勉矢天良仰副恤商裕

國之誠乃各款清完給發聯票查搭木戳聞有遲至二三卯不等非心存勒索何事稽延而給程提引又復稽留時日計其完課領運相隔旬餘在外省別府各商馳赴杭省完課道遠途艱一經守候資

斧較重成本益加殊非培植商艱之意除札飭運
司轉飭庫官書吏人等遵辦外合飭出示曉諭爲
此示仰兩浙商人知悉爾等業在行鹽輸完課項
自宜向上急公一律按卯全完不得絲毫欠缺一
切聯票木戳水程引目定限三日內逐件全數給
發該商開運如逾限不給許該商稟明本院并稟
運司究辦該商等亦不得藉端滋事其各凜遵

一嘉慶五年二月兩浙鹽運使司爲鄰私侵擾等事
照得兩浙行鹽地方有肩住之分肩販每將輕課

票鹽侵銷漁利兵捕規縱奸民窩頓以致正引減
銷私梟愈橫殊爲礙害旋據住商具稟杭紹票鹽
直達嘉湖通同地方梟棍乘各商掣竣運銷旺市
混擾正地叩賜檄飭杭紹各屬查拏並懇頒示嚴
禁等情當查肩販賤鹽膽敢越銷正地大干法紀
兵捕規縱尤屬膽玩現在掣運商鹽趕銷菜市之
候若再仍前擾混勢必正引壅銷除密訪查拏外
合亟示禁爲此示仰應巡兵捕及肩販人等知悉
爾等捕兵責任緝私務于要隘上緊巡查凡有前

指不法肩販敢再仍前越銷橫擾有礙正地務卽
人鹽並獲解縣究詳倘敢規縱怠巡察出定干究
革爾民戶人等務須買食官鹽不得貪賤食私自
取咎戾各肩販人等出具不致侵銷正地甘結送
縣察轉均毋違延

一嘉慶五年五月巡視兩浙鹽政爲嚴飭查拏私販
據實審擬以肅鹺政事照得兩浙商人行銷引鹽
上輸

國課下資民食是以設有專管場員稽查竈鹽透漏

又有地方文武協力巡緝於防範之法至周至密
各地方官場員果能認真查辦按法懲治則梟販
何難斂跡官引自能暢銷本院欽奉

恩命巡按兩浙鹽政亟思實力整頓首重疏引緝私茲
查各屬報獲私販俱稱場竈並無透漏不過希圖
從輕完結規避處分所有巡緝防守竟同虛設以
致私販充斥官引滯銷實於

帑課大有關礙今屆醬市盛行正閭閻疏銷之候除
通飭各屬遵照外合行曉諭爲此示仰閭屬官弁

兵捕軍民人等知悉爾等鄉愚各宜安分謀生毋得輕蹈法網應巡員役在於水陸要隘私鹽出沒處所實力堵禦上緊截拏無論大夥小販船裝陸運務期人鹽並獲解交該縣究擬詳報毋得怠巡疎漏得規包庇及姑息養奸顛預卒結一經本院查出定卽嚴究叅辦斷不輕宥各宜凜遵毋貽後悔

一嘉慶五年七月巡視兩浙鹽政爲嚴禁捆做重斤以疏引課事照得兩浙四所商鹽過掣內有重斤

夾帶漏課之弊疊經各前院出示諄諄告誡嚴行防範本院密加察訪錮弊雖漸屏除而積習仍難盡絕蓋各商賢愚不一在守法者固知自保身家不敢再蹈前轍其不肖之商妄冀僥倖一時積弊牢不可破任意捆做重斤每屆掣驗並不爭先搨配挨至時臨昏暮故作倉卒情形挨擠上掣或串通搨手簸弄手法或賄通胥役重疊扛擡種種弊竇難以枚舉殊不思此等伎倆不過倖免一時豈有日久不破之理該商等具有身家何樂以身試

法現屆各所開掣之際本院親臨驗掣因念衆商
挾本辦課不忍臨期坐視科罰合先出示曉禁爲
此示仰四所各地配商知悉嗣後商鹽出場務須
按引捆配抵所照掣搃準不得加斤夾帶惟利是
圖倘不肖之商怙終不悛一經掣出重斤定卽嚴
提該本商及船戶搃手分別訊明究辦從重懲治
勿謂言之不早也凜之慎之

一嘉慶五年七月兩浙鹽運使司爲申嚴掣鹽條約
以肅鹽政事照得紹所嘉慶四年分引鹽本司親

臨赴所掣驗除嚴催各場飭商捆運抵所候掣外
所有應行事宜合行出示曉諭爲此示仰官役商
民人等知悉務須其相遵守倘有違犯斷不輕貸
一到所引鹽務須先期照摺摺準依次停泊柵外
不得臨時壅擠及先後參差

一上摺秤驗商鹽例係工腳敲兌務使從公敲擊
畫一彈兌毋許絲毫弊混如敢簸弄手法以致多
寡失實一經察出立即究處

一船戶裝載引鹽必須鹽數相符自底至面逐引

堆疊敢有上下互異輕重不同違禁夾帶者察出定將船鹽封貯詳究不貸

一各商投引編號該所官攢須按季分編列細心查驗引目不得遺漏致干查究

一所橋等處該所官役務將柵欄脩整堅固船鹽編號停泊聽候按號喚掣給發旗籌過所呈繳毋許壅擠攙越至於往來客船該所驗明請匙放行若正在掣放引鹽之時客船不得夾雜亂行如敢故違定行究處

一商人請填餘引過掣原因鹽多引少之故現在
欽奉

諭旨飭禁多請餘引等因各商應將本名額引及子戶
引目掣足之外如有餘鹽方准請給餘引過掣若
本名額引未經掣足先行混請餘引過掣除不准
外定將該所書識暨本商重處不貸

一掣過船鹽船戶駕至義新兩壩堆地空船飛駕
回所復裝應掣如敢延挨時刻致悞掣期定行重
究

一本司訪聞該所每有無賴棍徒在於各商搢鹽處所三五成羣擁擠強討攘奪情弊該所官務須不時查逐不得容畱取咎

一嘉慶五年九月浙江巡撫兼署兩浙鹽政爲嚴禁興販私鹽以疏引課事照得兩浙引地濱臨江海近接鹽場最易透漏私販該管場員如果實心稽察所產鹽斤儘數交官則竈不售私梟徒何從興販無如該場員怠玩成習並不親歷稽查任聽差役庇縱竈戶串同私販透漏毫無顧忌又有肩販

挑賣票鹽在於馬頭船埠荷葉包紮售與船戶更有私煎窩頓積梟勾通興販兵捕地保徇私包庇地方官膜視鹽務並不認真查緝甚至獲犯到案亦不根究販私來歷任聽狡供總以買自不識姓名鹽擔曲爲開脫或將鹽斤分認詭稱同夥在逃化大爲小從輕擬結經由營汛又不上緊截拏因循玩縱種種弊端竟成錮習以致私梟肆行無忌官引日漸絀銷殊爲鹺害茲當菜市盛行正閭閻銷鹽之候除通飭各屬查拏梟販盡法究處外合

行曉諭爲此示仰按屬文武員弁兵捕竈販人等
知悉爾等愚民各宜安分謀生毋得販私輕蹈法
網應巡兵役在於水陸要隘私鹽出沒處所實力
堵禦加緊截拏毋論大夥小販船裝陸運務期人
鹽並獲交縣究詳不得怠巡疏漏得規賣放該縣
亦不得顛預率結倘敢故違一經本部院察出定
卽分別嚴叅從重治罪決不寬貸

一嘉慶五年十一月巡視兩浙鹽政爲嚴飭曉諭事
照得杭所鹽商開掣在邇查該所堆鹽掘房俱建

掣廳南北每逢掣驗各商鹽船定例應由南至北以憑過掣放行近查臨掣之時俱在北掣房臨期搃運過南致有由北至南之鹽船往來攪混其中不免影射飛渡之弊查該所候掣鹽船其在南掣房白應仍照前例預行搃準裝船候掣放行而在北掣房務須前兩三日內搃準預日盡行裝船運至廳南以憑屆期按臨同廳南之船挨順船號過掣魚貫北出新橋放行除行該所官轉飭遵照外合行出示曉諭爲此示仰該所掣廳南北掣房商

衆知悉爾等候掣引鹽務須遵照預日裝運挨順
船號至掣廳以南排泊聽候按臨掣驗毋許仍前
紊亂致滋隱混倘敢違悞以致臨期參差不齊定
卽查究不貸

一嘉慶五年十一月巡視兩浙鹽政爲嚴飭恪遵鹺
制以裕引課事照得商鹽運掣著有一定規條難
容違法滋弊茲當開掣之期商衆繁多工腳船戶
良頑不一誠恐奸狡貪利之輩舞弊營私輕蹈法
網合行出示嚴禁爲此示仰該所官攢及衆商船

戶人等知悉凡赴掣鹽船務須照例編排聽候按冊稽查挨次換掣各商務須遵照定數畫一拈準倘敢違例多斤輕則照例示罰重則按律究治至於夾帶飛渡以及添灌影射等弊本院現在嚴行察訪敢有違犯卽行從重究處再該所官攢查驗引目必須細檢毋許攙混滋弊彈兌工腳更須奉公敲擊不得簸弄手法輕重失實裝鹽船戶尤當守法載運勿得夾帶營私如敢故違定行提究斷不寬貸

一嘉慶五年十一月巡視兩浙鹽政爲嚴禁興販私鹽以疏引課事照得兩浙引地濱臨江海近接鹽場透漏販私最易滋弊本院欽奉

恩命巡視兩浙下車以來訪聞積弊多端現在設法查辦但兩浙行鹽幅幘廣闊全在地方文武實力督拏盡法究治以冀引地日有起色今查各屬報獲私鹽之案俱稱場竈並無透漏不過規避處分而巡緝地方亦屬虛應故事有名無實以致梟徒充越官引壅滯有虧

國帑實爲鹺害除大夥梟販現在嚴飭察訪截挈分別提究外查巡緝私販地方文武均有考成自應嚴督兵捕加緊查挈據實究詳務使梟竈咸知畏斂方於鹺政有裨現屆春菜盛行正民戶需鹽之候業經嚴飭各屬實力偵巡外合行出示曉諭爲此示仰闔屬文武員弁兵捕軍民人等知悉爾等愚民各宜安分謀生不得販運私鹽自罹法網應巡兵役在於水陸要隘實力堵禦認真躡緝凡遇大夥小販船裝陸運務必人鹽並獲解縣究詳毋

許儉安怠玩得規縱放以及因循從事匿不稟報
一經察訪確實大千重咎各宜凜遵毋忽

一嘉慶五年十一月巡視兩浙鹽政爲曉諭事照得
本院巡按兩浙凡鹽務利弊理應博採衆論兼聽
並觀上年下車伊始卽經出示曉諭准爾等甲散
各商隨到隨見毋許攔阻遲緩但不許單身一人
私自稟見所以杜夤緣而絕浮議也今本院欽奉
恩綸仍畱兩浙之任凡有商情尤須體恤竊念四所甲
商各有應辦之事若每日正副八人同集轅門一

班進見在本院固可以隨時詢問事宜恐該商等
於應辦公務不免顧此失彼轉致耽延貽悞爲此
示諭甲散各商知悉嗣後四所正副甲商分作四
班每日輪值上轅以便傳喚進見若非值日之甲
商而適有該所緊急公事亦准投稟請見如此分
班辦理庶可兩無歧悞至於各所散商如有公事
仍准其隨時稟見不必拘定所分但須值日之正
副甲商帶同進見以杜嫌疑此係本院於恤商之
中寓剔弊之意各宜凜遵毋違

一嘉慶六年二月兩浙鹽運使司爲嚴行飭禁事案查各縣毘連地方均有開設鹽店每有鄉民赴店買鹽勢難逢人盤詰逐一問其來歷卽有鄉民容心越販其罪原在越買之人本與商店無涉是以例定凡有鄉民越境買鹽毋論獲犯鹽數多寡只就本犯治罪不得株連商店關查擾累有礙行銷節經通飭遵照在案茲當菜市旺銷之際倘有不肖販徒踰界越賣出境被獲誠恐胥役人等奉行不力匿案滋擾提累商店有悞行銷大爲鹵害合

再嚴飭所有拏獲越界販鹽毋論獲犯鹽數多寡
照例只就本犯治罪不得匿案妄關株連商店有
悞行銷致干未便

欽定重修兩浙鹽法志卷十六終